



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Кончат ся вакаци.

Вакаци мают ся уж ку концу. Начинают ся уж новы обовязки дітей и родителей. Особенно родителям приходит ся нераз тяжко собрати новы грош на школьны оплаты, книжки и научны приборы. Початок школьного року отчувають всі родители, але нияктяжше приходит ся тым, котры посылают свои діти до высших школ и сут примужены оплатити за них также станцию и удержанє. Тоты часто призадумуют ся аж и над тым, ци не лучше буде перервати науку сына, або дочки и не оставити их в хаті, тым больше, же и так по окончению школы трудно достати занятє и треба быти дальше тягаром своей родины.

Однак так нам думати и робити не можна, бо нам потреба больше, як другим народам своей трудовой интеллигенции, котра вела бы перед в культуральной и экономической роботі нашего села. Тото, же по окончению школы не достают наши діти посад, не лем не повинно вздержати нас от посылания их до школы, але наоборот повинно стати ся заохотом. Мы повинни дбати о науку для дітей не для куска хліба и посадки, а для самой науки.

У нас до тепер отдавано діти до школы по тото, штобы позбыти ся их с господарства и сын по окончению школ ставал ся священником, урядником, адвокатом, лікарем або учителем. И яка-ж была с того користь для народа? Праві жадна. Поминаючи священников и учителей, котры жили меже народом и интересовали ся их культуральным и экономическим житєм и котры, (особенно священство) отограла велику роль в национальном житю того народа, решта жила по містах, для себе и счасом контакт их с селом перерывал ся цілковито. Была, правда, интеллигенция, але селянам было от того не легче, бо их sprawy не забували ся и не были звязаны с собом тісно лучными потребами, бідами и згрызотами.

Тож на селі не было и нит такого, кто бы вел перед в культуральной и экономической роботі и результат того такой, же на селі біда аж пищит, а тоты, котры окончили школы для куска хліба и посадки, на той посаді также бідуют. Видно с того, же посада не дала ани им самым счастья, а отдалила их от села и тым самым не принесла ниякой користи народови.

Зрозуміли тото уж давно многы западны народы, як німцы, голяндцы, бельгийцы и другы. Там уж отдавна посылаю діти до школы не для посадки, а для самой науки. Там людцы по окончению науки вертали на огцовский грунт и занимали ся господарством и аж втотчас поднес ся добробыт краю и счезла біда, бо тоту трудову интеллигенцию осілу на селі и живучу также с землі, боліло тото само, што и их сусідов, она мала с рештом селян тоты самы потребности, тоты самы болі и згрызоты и старала ся той сельской біді зарадити.

Примір того видиме и у нас в Польщі на той части, котра до 1918 р. находила ся под владінем России и Німеччины. В Галичині принимано поляков до урядов и они так, як и мы, пхали ся до них, в наслідок чого вся интеллигенция жила по містах и мало интересовала ся селом. Результат того такой, же Галичину до тепер называют ище краєм голодоморов.

В России и Німеччині неохотно принимано поляков на службу в урядах и они шмарили ся до господарства, торговли, ремесла и промысла и в скором часі поднесли добробыт до небывалых розміров.

У нас тепер тяжко о службу в урядах, але тото именно може выйде на нашу користь, бо молодеж по окончению школ мусит глядати хліба власным спрытом и промыслом, она силом факту осяде на селі и звяже тісно свои экономичесны sprawy со справami цілого села и буде трудити ся над поднесеніем его добробыта.

Заохоту и помоч в том направлении дає само правительство, котре вмісто давной одной гимназии, приготавливающей молодеж лем до урядов, творит тепер різны типы школ фаховых и рольничих, где наша молодеж може выучити ся на добрых господарей, ремесельников и купцов. В послідних часах г-н Премієр Складковский выдал зарядженє, же каждая громада (гмина) мусит в своем бюджеті переназначити якуси суму (найменьше 600 зл.) на стипендию для одного ученика, котрый буде ходити до школы на кошт громады. Зарядженє тото увеличит число учащой ся молодежи и причинит ся до поднесенія уровня села.

А молодеж нехай не боит ся того, же не достане посадки, ю по окончению школ прийме радо село, где ей труд и знания будут використаны для ей и загала добра,



Што нас жде.

Англицкий писатель Вельс, обговоруячи возможность будущей войны, пише меже иным:

„На світі громадит ся ряд общественных трудностей, спричиненных тым, же во всіх державах дорастают миллионы молодых людей, котры даремно глядают работы и не имеют надіи на успіх в житю. Сут они наполовину образованы, бажают жити весело, як тото видят в кинах и читают в бульварных повістях. Перевага с них ест за революционным зміном. Понеже, здає ся, жадно с теперешных правительств не знає, як дати им работу и надію и як виробити в них почутє дисциплины, прото ест певне, же тоты массы невикористаной молодой энергии будут вызывать непокой и трудности. Невдоволена молодеж буде держати каждое общество в положению фебровой горячки. Каждый буде мочи тых людей використати и найдут ся такы, котры их використают. Публичне житє буде чимраз опаснійше, покая не найде ся

дороги, штебы умістити тых людей в якоїсї новий вдоволяючой общественной системі".

Полим горького песимизма слова, містят в собі много мудрых правд, над котрыма вартат ся призадумати.

Утруднене зберанє хліба в Совітах.

Переведенє реформ єст значно легше на папері, як на практыці. Доказом того являють ся Совіты. Там переведено рольну реформу, полягаючу на том, же на місце малых хлопекых господарств заведено хлопскы комуны (колхозы) и кромі того потворено величезны державны господарства т. зв. совхозы. Всі полевы роботы на колхозах и совхозах сут уняты в формальны приписы центральных и рейонных властей, котрых мусят ся придержувати всі управителі тых господарств. Ведля тых приписов при збераню хліба с поля уживат ся машин т. зв. „комбайны". Сут то машины, котры жнут и молотят хліб. Сут они барз скомпликованы, трудны до обслугы, легко ся псуют и потребуют высоко выквалифицированных шоферов-механиков. Таких механиков маюти однак Совіты за мало, притом машины сут дост. планны.

Совітскы газеты (Известия и др.) описуют тепер, же жнива в Совітах идут поволи и с великим трудом. Меже иншими читат ся там, же на Кавказі совхозы начали жнива с великим опоздненєм и собрали до 12. серпня лем 35% пространства. Причинем того єст мало выдатна робота „комбайнов". В Марюпольском совхозі 22 комбайны в 14-ох днях собрали с поля лем 1459 га. Выпадат аджек по неполных 5 га на 1 машину денно, коли, ведля пляну, машина повинна денно собрати 60 га. Комбайны ребят поволи и недбало. Втраты в зерні сут величезны.

В западной Сыбири, котра кромі Украины, Дону и Кавказа єст головным сыпанцем хліба в Росии, приготовлено лем 13 процент потребных до жнив комбайнов, хоц жнива уж ся начали.

С Ярославля алярмуют „Известия", же барз поволи иде зберанє льну. Спека выпалат лен, але хлопцы-колхозники не спішат ся с роботом.

Так то быват все, коли робит ся на „панском". Як хлоп мал своє господарство то он не доіл и не доспал, лем робил, жебы начас собрати хліб с поля. Втотчас мал он и для себе и на продаж, так, же Росия являла ся наибольшим продуцентом хліба на світі. Тепер хлоп стал ся работником и робит на „панском". Не понаглят ся и хліб пропадат в поли. А шкода, бо не бракує тепер голодуючого народа, котрому тот хліб бы ся придал.

Власны сливки и яблока.

Заострены импортовы приписы вплинули сильно на ограниченє привоза до Польщи заграничных овощей.

Близко о 25 процент поменьшал ся привоз помаранч, мандарынок, сушеных сливок, фиг и миндалов. Ище больше бо аж о 80% понижил ся привоз свіжих яблок с Канады. Загалом через пол року спроваджено в том році заграничных ово-

чей за суму о 9 миллионов злотых меньше, як в том самом часі прошлого року.

Пониженє ся импорту овощей повинно отбити ся користно на наших садовничих господарствах и заохотити селян до закладаня новых садов.

В послідних літах видно у нас прекрасны новы сады, особенно в селах, где переведено комасацию грунтов, але тых садов єст все за мало, штобы заполнить цілковито краєвый рынок.

Тому закладанє новых садов має перед собою добры виды и може приносити властителям незлы доходы, притом гроши, котры тепер высылат ся за овощи до чужих держав, останут в краю.

Ци всі испанцы вымордуют ся?

Братоубийственная война в Испании не єст подобна до жадной войны на світі. Враг не находится выключно по другой стороні окопов. Он єст всяди. Незнати аж и того, ци вояк, котрый днеска воює против повстанцам, завтра сам ку ним не перейде.

Обі арміи воюют страшно. Не всі воякы маюти мундуры, гдекотры сут в світской одежи, а гдекотры в лахманах. Воякы тоты идут в бой с затисненыма зубами. В войні той не расходит ся о выгнанє врага с занятой территории, лем о того, штобы перемочи себе и свою совість, котра кричит и противит ся мордованю братов.

В войні той частійше приходит до розстрілов, як до убийств на поли брани. Анархисты впадають до домов и забирають „подозрілых" на свои смертельны, тягарны самоходы.

С другой стороны фронту ген. Франко заявил, же выбито уж всіх анархистов.

Счезло почтенє для людей. Тіла убитых поливат ся нафтом и подпалят. С живыми также не робит собі никто церемонии. Кто не думат так, як думат большинство, того жде смерть. Без жадных судов ставят ся єго под мур и розстрілює.

Каждый плінный знає, який жде єго конец. Тому и плінных в той страшной войні ніт. Радше згинути в бою, як пак под муром.

Отділы вояков, высыланы на фронт маюти смерть в очах. Знают, який жде их конец а помимо того идут! И будут бороти ся не лем с врагом, але и со своей совістю.

Не отпроваджают их матери, жены, сестры. Бо што-ж могут сказати они людям, котрых жде нехыбна смерть? И што могут сказати матери, смотрячи на свои маленькы діточки, если не знают, яка партия каже их розстріляти, як дойдут до 20-ох літ?

Заробкы на смерти людей.

В Испании, Палестыні, Абисынии, на Далеком Востоді, проливат ся потоками кров и гынут тысячами люди.

Одночасно акции фабрык оружия подносят ся, до воюющих краєв отходят легально и покрыйому транспорты оружия, продаваны тому, кто лучше платит.

Доходы торговцев смертью роснут с дня

на день, приносячи десятки и сотні миллионов. Понятно, што война для них являт ся сезон жнива и они через своих агентов старают ся заостряти меженародны конфликты и держати світ в военном страхе.

Француска палата депутатов приняла без дискуссии проект сената, же всі фабрыкы оружия маюти быти власностью державы. От того часу приватна торговля оружием во Франции устане и доходы с кырвы людей перестанут ити до кишень спекулянтов.

В теперешных условиях фабрыкы оружия мусят быти, але повинны найти ся в руках держав, не лем во Франции, але на цілом світі.

Втотчас не буде агентов, старающих ся о того, штобы доходило до воен и спекулянтов, наживающих на войнах величезны маєткы.

Проект автономии Подкарпатской Руси.

Газеты с Подкарпатской Руси доносят, же тамтешны рускы национальны организации приготовили уж проект автономии для Подкарпатскй Руси.

Проект тот буде предложенный чехословацкому правительству в формі меморіяла и домагат ся, штобы права губернатора Подкарпатской Руси были расширены на всі территории, населены рускым народом. Кромі того проект домагат ся заряджєня выборов до автономного подкарпато-русского сейма и введения русского языка в школах, администрации и суді.

Выкрыте шпьяонскы аферы в Румунии.

Румунским властям удало ся выкрыти на терені краю велику шпьяонску организацию, дійствующу от долшого часу на користь Венгрии. Организация тот, котра дійствовала под тайном назвом „Амазонка" складала ся переважно с барз красных женщин, котрых задачом было навязати контакт с офицерами румунской арміи в ціли выдобыти от них подробностей, относительно организации арміи.

„Амазонки Венгрии" вывязовали ся с задачи добре. Шефом той организации была Вильма Якабфы, женщина незвычайной красоты, перебиваюча стало в найвызших цивильных и войсковых кругах на пограничі Семиграда.

Организация тот, як ся оказало, вела свою шпьяонску роботу уж от долшого часу. Выкрыте той организации послідовало совсем случайно. Дотепер арестовано Вильму Якабфы, одного офицера и много других.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО"

Як густо сієме зерно.

Зерно годуватиме чоловік уже от пару тисяч літ. Через той довгий час зерно привикло до ґрунтових і кліматичних умов. Якщо ті умови будуть змінюватися, то треба докинути виготовити якусь нову отміну, або породу зерна, бо інакше зерно пропаде. Так само пропадатиме зерно, коли його довго сієме на тому самому ґрунті. Знають про те наші селяни і змінюють щорічно пару літ насіння до сіяння. Не всі однак отміни надають ся до кожної землі і кожного клімату і тому є у нас спеціальні дослідники заведення, котрі на основі паролітної практики і спостережень поручають поодиноким закуткам краю такі отміни, котрі відповідають найкраще кліматичним і ґрунтовим умовам.

Маючи однак добре приготівлений ґрунт і добру отміну зерна на засів, мусимо також звернути увагу на те, як густо зерно розсіяти. В наших умовах сієме звичайно 100 кг. зерна на 1 морг. Але при сіві треба взяти под увагу декотрі обставини, при котрих мусити сіяти густіше, або рідше. Якщо нпр. сієме отміну не місцеву, але убагороднену, походять з певного і солідного жерела, то з уваги на велику полонність той отміни можемо сміло сіяти рідше о 10%, щадячи тим самим на дорогому насінні. Якщо ґрунт з природи є життєвий і при тому старанно оброблений і багатий на живильні речовини, то висів можемо поменшати аж і до 15%, бо числимо на те, що в добрих умовах зерно розкорениється і розростеться сильніше, як лем буде мати достаточного вільного місця. Через рідший засів буде вільне простірство, на котрому розростуться сильніші стебла.

Також можемо сіяти рідше в той час, коли сієме вчасно. Числимо в той час на те, що рослини мають час закоренитися добре, а маючи розвинену сильно систему кореневу, можуть вижити аж і сильно розроснені рослини.

Але може бути і так, що випадатиме засіяти зерно в ґрунт слабший і планше оброблений. Не було часу переорати 2 рази ниву, ґрунт не є сильно знавожений, зерно є планше, засів поздній і т. д. В той час треба сіяти густіше, бо рослина в умовах планших буде розвиватися слабше, система кореневу буде слабо розвита і не може достаточного откормити рослини. В таких умовах мусимо сіяти густіше, бо якщо б ми сіяли рідко, понижимо вроди.

Густота сіву залежить також від цілі, для котрої сієме якусь рослину. Якщо нпр. сієме лубин на насіння то сієме його ведля норми (100 кг. на 1 морг), але якщо той сам лубин сієме на зелену пашу, то сієме його густіше (115 кг. на 1 морг). Так само поступимо при сіянні зерна на зелену пашу.

В останніх часах починають бесідувати і робити проби з рідкими сівми (около 10 кг. на 1 морг), але такий сів вимагатиме незвичайних умов і опіки, в виду чого у селян не може мати примінення.

Нормою висіву в наших умовах для зерна остає все 100 кг. на 1 морг. Але той норми не можна держати ся сліпо і кожен селянин мусит сам рішати, який сів буде найвідповідніший на його ґрунт.



Банк Рольний дає позички на родинні сплати.

Маючи на цілі охорону дрібних господарств, що мають від 5—15 гектарів землі від поділу меж членів родини і заміни їх на карлові господарства, Державний Банк Рольний почав уділяти низкопроцентні позички на родинні сплати. Висота процента тих позичок виносить 1 1/2 процент рочно, а сплатити їх можна через 10, 15, 20 і 25 літ. Найменша сума позички виносить 1500 зл. Конечним умовом для одержання той позички є те, що стараючий мал чисту і урегульовану гіпотечку, заінтабульовану на власне ім'я.

Щоб цілком урегулювати родинні поділи, позичку дає лем в тих випадках, коли власник господарства сплатить цілком тих всіх з родини, кому належать родинні сплати. Згідно з тією основною ціллю — позичок не достануть родичи, котрі, бажаючи остати при господарстві, хотять сплатити власні діти з титулу їх маєткових ділів, бо така сплата не запобіжить поділові господарства в пару, або в парундцет літ поздніше.

На ту ціль Державний Банк Рольний достав від Міністерства Рольництва всього 4 мільйони злотих.

Братя Лемки!

Наш святий обов'язок пам'ятати о кращих синах і братах, погинулих в нерівній боротьбі за святі ідеали отців і пращів, за Віру і Народ і пам'ят о них передавати з покоління в покоління.

Щоб виконати той наш долг уряджує ся день 30-го серпня т. р., в неділю

ПЕРШЕ ВСЕНАРОДНЕ ТОРЖЕСТВО, присвячене пам'яті Талергофців і всіх погинулих двадцять два роки тому назад за Віру і Народ.

Всі в ком бє руске серце і горить іскорка любові до наших отців і братів, станьте численно в ряди того великого Народного Торжества, щоб довести до кінця любов до свого народу і відданість завітам наших отців і братів-мучеників, а разом з тим щоб і набрати кріпкого духа і укріпити свої сили в дальнійшій боротьбі за святую Правду.

Програма Талергофського Торжества

- 1) Вечером 29. серпня і рано 30. сповідь для желючих.
- 2) О 6-ой год. рано в неділю 30-го, утренняя і Служба Божья.
- 3) О 9-ой год. процесія на гору до пам'ятника Талергофців. Божественна Литургия і литія по погинулих за Віру і Народ Талергофців.
- 4) По Литургии собранє в селі Чорне, получене с Днем Руской Культуры, в програму котрого входять доклады: а) про Св. Владимира Великого, основоположника русской культуры, б) св. братьев Кирилла и Методия, яко просвітителів славян і руского народа, бесіди, церковні і світські хоры.

По „Сїзді Горском“ в Сяноці.

В днях от 14—17. серпня т. р. відбувся „Сїзд Горский, в котрому прийняли участь групи всіх регіонів горських, от шлезаків аж по гуцулів.

Сїзд той був великим показом народної культури всіх регіонів. Поодинокі групи виступали з народними піснями, танцями і представленнями своїх звичаїв і обичаїв. Сянок сам виступив з добре приготівленим мужеским хором под керівництвом проф. Гички, а також з оперетою „Перешкода“, до котрої музику доробив пр. Гичко. Так музика оперети (військової оркестр) як і гра поодиноких осіб, а також чудний голосовий матеріал і незвичайно добре вишколені зробили на глядачів велике враження. Попросту забувалося о дійсності, а здавалося, що єсть ся в якомусь великому театрі.

Слабим стороною були може занадто довгі дільці, котрі не пошкодило б в границях можливості скоротити.

З інших груп звернули на себе увагу мішаний хор групи горлицько-сандецької, котрий под керівництвом д-ра Романовського співав прекрасно ряд лемковських пісень, нагороджених неумолкаемыми рукоплесканнями, коломейка груп гуцульських, танець групи з Турки і збойницький танець групи новосандецької.

На особенну увагу заслужило собі весілля, отгране через групу з Завадки Рымановської тим, що був то образ взятий точно з життя і звичаїв нашого народу. Молоді в вінцях сплетених з овсяної ряс (наш лемко аж і на весіллі думав лем о овесі і бандурках, прим. склад.) бують поклони перед цілою дружиною, гудаци грають обертаного, а дружина співає і потупкує. Бракло лем горілочок і порційки, а можна б було забути ся і шмарити дашто до бас.

В другий день учасники поїхали до Команчи, де відбувся торжественно откритє новопобудованої дороги названої ім. ген. Каспржицького, а третого дня прийняли всі участь в прекрасно придуманій роботі, а іменно в побудованню нової дороги. Ідею тому поддав гр. Потоцький з Рыманова, котрий кожного року зберав на оден день людей з повіта, щоб кращими силами поправляти старі, зруйновані і будувати нові дороги. Завдяки його трудам і ініціативі зроблено в сяноцькому повіті уже багато в тому напрямку. Тепер, хоча використати великий сїзд людей в Сяноці і заохотити їх до поширення по інших повітах той корисний і конечний акції, комітет Сїзда продемонстрував таку роботу в Залужі коло Сянока. На той торжество приїхав також наш Вишестейший Владика, Ексселенція Д-р Медвецький, котрий поблагословив починаюче ся добре діло.

Сїзд той затіснив узи братської любові горських регіонів—групи познайомилися взаємно і полюбили. В милому настрою і з жалем розїжджалися третого дня вечером в свої сторони.



Што чути в світі.

Прага: Дня 20. серпня начали ся в Чехословакии великы осенны маневры при участі президента д-ра Бенеша. Маневры переводит ся ведля найновіших военных метод с приміненєм газів и бомбардуючих самолетов, котры дала совітска армия. В маневрах принимают участь совітскы офицеры.

Букарест: В селі недалеко Ботошан (Бессарабия) мал місце страшный случай. Дівчина Сандюк, по цілодневной роботі в поли, положила ся при копі сіна и заснула так твердо, же в часі сна вползнула ся ей до губы гадина, достаючи ся аж до жолудка. Помімо лікарской помочи дівчина умерла.

Парыж: Испанскый самолет шмарил 3 бомбы на пограничне французске містечко Бизитон. Одна бомба упала на хату, нищачи ю цілковито. Жертв в людях не было. Ци самолет належал до повстанцов, ци тыж до правительственных войск — дотепер не усталено.

Лизбона: Самолеты повстанцов збомбардовали панцерный корабель, стоячий на услугах мадритского правительства. Корабель затонул.

Севиля: Ведля послідных обчислень число убитых в испанской войні выносит 50 тысяч людей. Раненых єст понад 135 тысяч.

Бургос: Каталонске правительство предложило нейтральность за ціну удержаня автономии Каталонии.

Парыж: Францускы газеты в описі домашней войны в Испании подают, же діють там страшны річи. По занятю одного міста повстанцы розстріляли 1200 людей за того, же подозревали их о симпатии для правительства. Была то така різь, же дорога была залаяна кривью. Таки самы екзекуции переведено в других пунктах міста, розстрілюючи людей аж и в костелах перед олтарями.

Мадрыт: Газеты подают, же в Мадрыті організовано воздушный відділ, до котрого зголосили ся летчики с чужих держав, а именно французы, рускы и німцы-коммунисты. Мадрыцке правительство закупило для того відділа 23 бомбовы самолеты.

В Москві начал ся процес Зиновьева, Каменьева и 14-ох других, оскаржених о того, же пляновали они захват на Сталина и предпринимали ряд террористических актов, а также о того, же нязвали контакт с органами німецкой полиции политической „Гестапо“.

С Палестины доносят, же всі дотепершны зарядженя английских властей не потрафили здавити террористической акции арабов. Населенє жидовске єст тым сильно огорчене и готовят ся до контраркций на власну руку.

В Гданску помімо заказу, выданого гданским сенатом отбывают ся дальше походы национально-социалистических віддіков, співаючих против польскы боевы пісні.

Льондон: Выборы до парламента в канадской провинции Квебек окончили ся побідом французской партии национального одыинства, котра одержала 3/4 части мандатов.

Програма той партии містит в собі постулат утвореня новой французской державы в Америкі, котра входила бы в будущности в склад бриттской империи, але была бы независима от центрального канадского правительства.

Вісти с краю.

Варшава: Француска дыпломатия оціняє вызыты ген. Гамелена, яко частично вдоволяючи. Ряд справ поставлених ген. Гамеленом ген. Рыдз-Смиглому буде обсуждана через кабинет министров, а отвіт завезе ген. Рыдз-Смиглы до Парыжа. От того отвіта буде зависима в великой степени сила француско-польского союза. Ген. Рыдз-Смиглы выберат ся до Парыжа в вересні т. р.

Варшава: В послідный день побыта в Варшаві ген. Гамелен был принятый через г-на Президента Р. П. на замку, где вручено ему ордер: „Polonja Restituta“.

Варшава: По визиті ген. Гамелена має прихати в коротком часі до Польщи шеф румунского генерального штабу ген. Самсоновичи.

Гдыня: Греческый корабель „Ксенос“, котрый отплынул с Гдыні до Греции, высадил на Гелю молодого жида со Львова, котрый хотіл переіхати задармо с Гдыні до Греции.

Коло Вильна мала місце страшна желізнодорожна катастрофа. С Вильна до Нововилейкы вирушила льокомотыва. В часі їзды машинист выхилил ся и ударил головою о столб. В наслідок того он сомліл и выпал с льокомотывы. Льокомотыва гнала дальше без обслуги и ударила с полным розгоном на поїзд. Удар был страшный. Машинист и его помощник убили ся на місци, 4 вагоны разбились цілковито, 17 людей єст раненых.

Тарнов: В часі публичного собрания, скликаного 15. серпня через „Stronnictwo Ludowe“ до Вержхославиц (родинне село Витоса), на котром собралось около 10 тысяч народа, члены той группы напали на полиціянта Ратайчака и побили его киями. Ратайчак скрыл ся на постерунку полиции. Толпа в числі 200 людей вооружена в камені и друкы здемолювала будынок полиции и подпалила его. Коли выважено двери до постерунка, 5-ох полиціянтов в обороні власного житя отдало килька стрілов до напастников, в наслідок чого 1 человек был убитый и 2-ох раненых. Ратайчак боре ся со смертю. На місце прихали слідчи власти и воевода г-н Гноинский.

Милы гости: До хаты Кар. Переш в повіті равско-мазовецком запукали 2 хлопы и попросили о воду. В часі коли Переш брала шклянку с шафы, хлопы шмарили ся на ню и сорвали ей с грудей мішочок, в котром мала 200 зл., а пак заткали ей шматом уста, утекли.

Повідомлена о нападі полиция, задержала обох напастников. Сут то: Густав Шплет л. 41. тесля и его братанок Оскар л. 21, оба с Томашова Мазовецкого. При арестованных найдено мішочок с грошами. Милых гостей отставлено до Варшавы и осажено в арестах.

Не дошла до порога: В часі бурі, одна баба с села Суха злізла с дерева, на котром рвала вишні и пустила ся ку доми. Не дошла однак до хаты, бо по дорозі ударил в ню гром. Упала нежива о пару кроков от порога хаты.

В НЕДІЛЮ, ДНЯ 7. ВЕРЕСНЯ 1936.

о год. 2-гой по полудни

— уряджат —

читальня им. М. Качковского в Милику новосандецкого повіта

Танергофске свято,

на котре запрашат всіх тых, кому дорога память народных мучеников світовой войны.

Выділ Читальні.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТНУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекurationsком Товаристві

ВИТА И КРАКОВСКЕ
во ЛЬВОВІ

Асекurationsку принимают на цілой Лемковщині
представителі: гг. Осиф Яновицкий — Крыница-Село и Михаил Перелом — Сянок.